

DATE: 19/10/2007

Dr. Mahathir tunggu kebenaran doktor untuk pulang

KUALA LUMPUR 18 Okt. – Bekas Perdana Menteri, Tun Dr. Mahathir Mohamad hanya menunggu 'lampu hijau' daripada doktor untuk keluar dari Institut Jantung Negara (IJN) dan pulang ke rumah berikutan keadaan kesihatan yang semakin pulih.

Anaknya, Datuk Mukhriz berkata, bapanya gigih melakukan senaman bagi menguatkan otot-otot tubuhnya sementara menunggu kebenaran doktor.

"Bapa saya sering menghabiskan masanya dengan bersenam dan berjalan di sekitar wad. Hari ini beliau berjalan lebih jauh berbanding hari-hari sebelum ini," katanya ketika dihubungi di sini hari ini.

Menurut Mukhriz, bapanya memang berharap untuk dibenarkan pulang ke rumah setelah selesai menjalani rawatan fisioterapi.

Beliau bagaimanapun menyatakan Dr. Mahathir dikehendaki meneruskan rawatan fisioterapi secara kerap sama ada di hospital atau rumah.

"Adalah lebih baik kalau bapa saya dibenarkan menjalani rawatan fisioterapi di rumah bagi memastikan beliau mendapat rehat yang cukup kerana perjalanan ulang alik dari rumah ke hospital akan memenatkan beliau," katanya.

Dr. Mahathir menjalani pembedahan

pintasan jantung di IJN pada 4 September lalu dan pembedahan kedua bagi membersihkan jangkitan pada 22 September lalu.

Menurut Mukhriz, pagi ini Dr. Mahathir bersarapan roti dan telur serta menikmati mi Korea yang disediakan di rumah untuk hidangan makan tengah hari.

"Kami perlu mempelbagaikan menu setiap hari supaya beliau tidak perlu makan makanan yang sama dan tidak menyelerakan.

"Selain itu, selera bapa saya juga bertambah baik dan semua makanan yang dihidangkan habis dimakan," katanya.

Petang ini Dr. Mahathir menerima kunjungan bekas rakan kongsi Klinik Maha di Alor Star yang hanya dikenali dengan panggilan Dr. Shah.

Mukhriz yang tiba di IJN pada pukul 11.30 pagi ini meluangkan masa kira-kira dua jam bersama bapa dan ibunya, Tun Dr. Siti Hasmah Mohd. Ali di hospital jantung itu.

DR. MAHATHIR Mohamad yang gigih melakukan senaman di IJN disiarkan di blog anaknya, Marina Mahathir, semalam. Turut kelihatan isteri, Tun Dr. Siti Hasmah Mohd. Ali.

